

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj 7/10), na prijedlog Ministarstva zdravstva, Vlada Zeničko-dobojskog kantona, na 14. sjednici održanoj dana 11.06.2015. godine, d o n o s i

ZAKLJUČAK

I.

Utvrđuje se prijedlog Zakona o osnivanju Javne ustanove institut za zdravlje i sigurnost hrane Zenica.

II.

Prijedlog Zakona iz tačke I. ovog zaključka upućuje se u dalju skupštinsku proceduru po skraćenom postupku.

III.

Zaključak stupa na snagu danom donošenja.

Broj: 02-_____/15

Datum, 11.06.2015. godine

Z e n i c a

PREMIJER

Miralem Galijašević

DOSTAVLJENO:

1x Ministarstvo zdravstva Zeničko-dobojskog kantona,
1x Ministarstvo za poljoprivredu, šumarstvo i vodoprivredu,
1x Stručna služba Skupštine Zeničko-dobojskog kantona,
1x a/a.



PRIJEDLOG

Z A K O N

**O OSNIVANJU JAVNE USTANOVE INSTITUT ZA
ZDRAVLJE I SIGURNOST HRANE ZENICA**

PRIJEDLOG

ZA DONOŠENJE ZAKONA O OSNIVANJU JAVNE USTANOVE INSTITUTA ZA ZDRAVLJE I SIGURNOST HRANE ZENICA

Predlažemo da se ovaj zakon donese po skraćenom postupku, saglasno članu 140. Poslovnika o radu Skupštine Zeničko-dobojskog kantona („Službene novine Zeničko-dobojskog kantona“, broj: 3/12), jer nije u pitanju složen i obiman zakon koji zahtijeva redovnu proceduru, budući da se radi o osnivanju Javne ustanove Institut za zdravlje i sigurnost hrane Zenica, čiji bi osnivač bila Skupština Zeničko-dobojskog kantona. Ova ustanova bi uz zajedničko iskorištavanje postojećih prostornih, materijalno-tehničkih i ljudskih resursa Zavoda za javno zdravstvo Zeničko-dobojskog kantona, kao i Veterinarskog zavoda koji je pozicioniran kao kantonalna uprava u sastavu Ministarstva za poljoprivredu, šumarstvo i vodoprivredu Zeničko-dobojskog kantona obavljala poslove iz oblasti javnog zdravstva i oblasti veterine, a za potrebe Zeničko-dobojskog kantona. Novoformirana ustanova bi preuzela obavljanje djelokruga rada i nadležnosti zavoda za javno zdravstvo kantona utvrđenih Zakonom o zdravstvenoj zaštiti („Službene novine Federacije BiH“, br. 46/10 i 75/13), Zakonom o zaraznim bolestima („Službene novine Federacije BiH“, broj 29/05), propisima donijetim na osnovu navedenih zakona, kao i drugim zakonima i propisima iz oblasti zdravstva koji reguliraju djelatnost i nadležnosti zavoda za javno zdravstvo kantona. Ova ustanova bi preuzela i obavljanje veterinarske djelatnosti na području kantona, a saglasno sa Zakonom o veterinarstvu („Službene novine Federacije BiH“, broj 46/00), Zakonom o veterinarstvu u BiH („Službeni glasnik BiH“, broj 34/02), drugim propisima iz ove oblasti, kao i odredbama člana 15. stav 6. Zakona o kantonalnim ministarstvima i drugim tijelima kantonalne uprave - Prečišćen tekst („Službene novine Zeničko-dobojskog kantona“, br. 13/08, 3/10 i 6/12). Javna ovlaštenja iz oblasti veterinarstva će se posebnim zakonom prenijeti sa Ministarstva za poljoprivredu, šumarstvo i vodoprivredu na Institut za zdravlje i sigurnost hrane Zenica.

Iz svih gore navedenih razloga predlažemo donošenje Zakona po skraćenom postupku.

Na osnovu člana 37. stav 1. tačka f) Ustava Zeničko-dobojskog kantona, kao i na osnovu člana 3. Zakona o ustanovama (Službeni list RBiH, br. 6/92 i 13/94), Skupština Zeničko-dobojskog kantona, na __ sjednici, održanoj _____, donosi

ZAKON O OSNIVANJU JAVNE USTANOVE INSTITUT ZA ZDRAVLJE I SIGURNOST HRANE ZENICA

POGLAVLJE I. – OPĆE ODREDBE

Član 1.

(Osnivanje Instituta)

Zakonom o osnivanju javne ustanove Institut za zdravlje i sigurnost hrane Zenica (u daljem tekstu: Zakon) osniva se javna ustanova Institut za zdravlje i sigurnost hrane Zenica (u daljem tekstu: Institut), čiji je osnivač Skupština Zeničko-dobojskog kantona (u daljem tekstu: Osnivač), uređuje njegov položaj, djelokrug, nadležnosti i ovlaštenja, kao i druga pitanja od značaja za funkcioniranje i rad Instituta.

Član 2.

(Nadležnost)

(1) Institut, u okviru nadležnosti utvrđenih ovim zakonom, obavlja stručne i druge poslove iz djelatnosti i nadležnosti zavoda za javno zdravstvo kantona koje su regulirane Zakonom o zdravstvenoj zaštiti („Službene novine Federacije BiH“, br. 46/10 i 75/13), Zakonom o zaštiti stanovništva od zaraznih bolesti („Službene novine Federacije BiH“, broj 29/05), propisima donijetim na osnovu navedenih zakona, kao i drugim zakonima i propisima iz oblasti zdravstva koji reguliraju nadležnosti zavoda za javno zdravstvo kantona.

(2) Institut, u okviru nadležnosti utvrđenim ovim zakonom, obavlja stručne i druge poslove iz djelatnosti i nadležnosti veterinarskog zavoda kantona utvrđenim Zakonom o veterinarstvu („Službene novine Federacije BiH“, broj 46/00), Zakonom o veterinarstvu u BiH („Službeni glasnik BiH“, broj 34/02), drugim propisima iz ove oblasti.

Član 3.

(Prestanak sa radom zavoda)

Osnivanjem Instituta prestaje sa radom Zavod za javno zdravstvo Zeničko-dobojskog kantona, čime Institut postaje pravni sljednik Zavoda za javno zdravstvo Zeničko-dobojskog kantona.

POGLAVLJE II.- NAZIV I SJEDIŠTE

Član 4.

(Naziv Instituta)

- (1) Institut je javna ustanova u državnoj svojini.
- (2) Naziv javne ustanove je: Institut za zdravlje i sigurnost hrane Zenica.
- (3) Skraćeni naziv ove ustanove je INZ Zenica.
- (4) Za komunikaciju u međunarodnom pravnom saobraćaju, Institut koristi naziv na engleskom jeziku koji glasi: Institute for Health and Food Safety Zenica.

Član 5.
(Sjedište Instituta)

Sjedište Instituta je u Zenici.

POGLAVLJE III.- ZNAK, PEČAT I PRAVNI STATUS

Član 6.
(Sticanje pravnog statusa)

Institut stiče status pravnog lica danom upisa u registar kod nadležnog suda, a saglasno odredbama ovog Zakona.

Član 7.
(Pečat)

- (1) Institut ima pečat.
- (2) Pečat Instituta je okruglog oblika, promjera 50 mm, u kome je koncentričnim krugovima upisan tekst latinicom: "Institut za zdravlje i sigurnost hrane Zenica", kao i broj pečata.
- (3) Pored pečata iz prethodnog stava Institut ima, za posebne potrebe, pečat istog sadržaja i teksta, promjera 25 mm.
- (4) Institut može imati i znak, o čemu odluku donosi Upravni odbor Instituta.
- (5) Znak Instituta iz stava 4. ovog člana može biti stiliziran.
- (6) Odluku o broju pečata, načinu upotrebe i čuvanja donosi Upravni odbor Instituta.

POGLAVLJE IV. – DJELATNOST I ORGANIZACIJA

Član 8.
(Okvir djelatnosti Instituta)

Djelatnost Instituta obuhvata obavljanje poslova iz javno-zdravstvene i veterinarske djelatnosti.

Član 9.
(Djelatnosti Instituta)

- (1) Djelatnost Instituta iz oblasti javnog zdravstva uključuje obavljanje sljedećih poslova:
 - a) predlaže programe zdravstvene zaštite iz djelokruga svog rada,
 - b) provodi zdravstveno statistička istraživanja u svrhu praćenja, procjene i analize zdravstvenog stanja stanovništva, kao i organizacije i rada zdravstvenih ustanova za područje kantona,
 - c) prati, ocjenjuje i analizira zdravstveno stanje stanovništva, kao i organizaciju i rad zdravstvenih ustanova na području kantona,
 - d) planira, organizuje i provodi aktivnosti promocije zdravlja i zdravstvenog vaspitanja stanovništva,
 - e) učestvuje u planiranju, predlaganju i provođenju mjera za sprečavanje, rano otkrivanje i suzbijanje hroničnih masovnih bolesti,
 - f) prati, analizira i ocjenjuje uticaj okoline i hrane na zdravstveno stanje stanovništva na području kantona, te predlaže mjere za unapređenje stanja u oblasti,
 - g) provodi preventivno vaspitne mjere zdravstvene zaštite u osnovnim i srednjim školama, kao i fakultetima za područje kantona,
 - h) koordiniše, usklađuje i stručno povezuje rad zdravstvenih ustanova za područje kantona,
 - i) kontinuirano provodi mjere higijensko-epidemiološke zaštite i nadzora sa epidemiološkom analizom stanja na području kantona i provodi protivepidemijske

- mjere, te nadzire provođenje obaveznih imunizacija,
- j) obavlja raspodjelu obaveznih vakcina zdravstvenim ustanovama na primarnom nivou zdravstvene zaštite na području kantona,
 - k) nadzire provođenje mjera dezinfekcije, dezinsekcije i deratizacije, te provodi preventivne i protivepidemijske postupke dezinfekcije, dezinsekcije i deratizacije za područje kantona,
 - l) obavlja sanitarnu hemijsku i sanitarnu mikrobiološku dijagnostičku djelatnost,
 - m) učestvuje u izradi i provođenju pojedinih programa zdravstvene zaštite u vanrednim prilikama,
 - n) stručno-metodološki nadzire i usmjerava rad higijensko-epidemioloških službi na području kantona,
 - o) sarađuje sa drugim zdravstvenim ustanovama na području kantona, kao i sa nadležnim organima lokalne samouprave i drugim ustanovama i organizacijama od značaja za unapređenje javnog zdravlja,
 - p) planira, organizuje i provodi djelatnost kontinuirane medicinske edukacije i kontinuiranog profesionalnog razvoja u sektoru zdravstva,
 - r) izrađuje, implementira i evaluira projekte u oblasti zdravstva i zdravstvene zaštite,
 - s) provodi obuku zaposlenih za sticanje osnovnih znanja o higijeni životnih namirnica i predmeta opšte upotrebe, kao i ličnoj higijeni lica, koja rade u proizvodnji i prometu životnih namirnica i predmeta opšte upotrebe,
 - t) obavlja hemijske, bakteriološke, serološke, toksikološke i virusološke preglede i ispitivanja u vezi sa proizvodnjom i prometom životnih namirnica, vode, vazduha i predmeta opšte upotrebe, kao i preglede u vezi sa dijagnostikom zaraznih i nezaraznih bolesti,
 - u) ispituje zdravstvenu ispravnost vode za piće, vode za dijalizu, vode za rekreaciju, površinske i otpadne vode, stanje vodoopskrbe, te zdravstvenu ispravnost životnih namirnica i predmeta opšte upotrebe,
 - v) provodi mjere dezinfekcije, dezinsekcije i deratizacije,
 - z) predlaže i provodi aktivnosti na unapređenju sistema zdravstvene bezbjednosti proizvodnje i prometa životnih namirnica, vode i predmeta opšte upotrebe u cilju smanjenja rizika od obolijevanja i drugih štetnih posljedica po zdravlje,
 - aa) vrši zdravstveni nadzor nad kliconošama, zaposlenim i drugim licima u skladu sa propisima o zaštiti stanovništva od zaraznih bolesti,
 - ab) daje stručno mišljenje o opravdanosti osnivanja, proširenja, promjene ili prestanka rada zdravstvene ustanove u skladu sa čl. 56, 58. i 60. Zakona o zdravstvenoj zaštiti,
 - ac) vrši sanitarne preglede zaposlenih koji se obavezno provode radi zaštite stanovništva od zaraznih bolesti, zaštite potrošača, odnosno korisnika,
 - ad) učestvuje u provođenju vanjske provjere kvaliteta stručnog rada u drugim zdravstvenim ustanovama i privatnoj praksi,
 - ae) obavlja i druge poslove u skladu sa zakonom iz oblasti zdravstva koji su dodijeljeni zavodu za javno zdravstvo.
- (2) Djelatnost Instituta iz veterinarske djelatnosti uključuje obavljanje sljedećih poslova:
- a) prati, analizira i proučava stanje u pogledu pojave, kretanja, suzbijanja i iskorjenjivanja zaraznih, parazitskih i drugih bolesti kod životinja i zoonoza,
 - b) obavlja terensku i laboratorijsku dijagnostiku zaraznih, parazitskih i drugih bolesti kod životinja i zoonoza,
 - c) prati i analizira preventivna i zaštitna cijepljenja i dijagnostička ispitivanja životinja,
 - d) planira i organizuje mjere dezinfekcije, dezinsekcije i deratizacije radi sprečavanja širenja, suzbijanja i iskorjenjivanja zaraznih bolesti kod životinja,
 - e) obavlja laboratorijske pretrage proizvoda životinjskog porijekla i vode radi

- utvrđivanja zdravstvene ili higijenske ispravnosti i kvaliteta,
- f) prati, analizira i ocjenjuje uticaj okoline na zdravstveno stanje životinja,
 - g) obavlja laboratorijske pretrage rezidua i drugih biološki aktivnih materija u životinjama, proizvodima životinjskog porijekla, hrani za životinje i vodi,
 - h) obavlja ispitivanja radioaktivnih materija na i u životinjama, u proizvodima životinjskog porijekla i u hrani za životinje i vodi,
 - i) obavlja toksikološka ispitivanja životinja, proizvoda životinjskog porijekla i hrane za životinje,
 - j) pruža stručnu pomoć veterinarskim organizacijama i proizvođačima proizvoda životinjskog porijekla i hrane za životinje,
 - k) obavlja i druge poslove u skladu sa ovim zakonom, kao i propisima iz oblasti veterinarstva, a koji su dodijeljeni veterinarskom zavodu.
 - l) vrši kontrolu ispravnosti repromaterijala za proizvodnju svih namirnica,
 - m) vrši kontrolu zdravstvene ispravnosti sirovina za prehrambenu industriju,
 - n) učestvuje u zaštiti zdravlja stanovništva od rezidua, upotrijebljenih aditiva, herbicida, insekticida, hormona, antibiotika, anabolika, teških metala, radionukleida i drugih sredstava koje se koriste u poljoprivrednoj proizvodnji.

(3) Institut, pored poslova utvrđenih stavovima (1) i (2) ovog člana, obavlja i sljedeće poslove:

- a) vrši druge laboratorijske analize koje su potrebne radi cjelovitijeg obavljanja djelatnosti Instituta,
- b) implementira projekte koji doprinose unapređenju zdravlja ljudi, životinja i biljaka, kao i projekte koji doprinose osiguranju proizvodnje i prometa zdravstveno ispravne hrane,
- c) učestvuje u uspostavi i funkcionisanju sistema reagovanja u kriznim situacijama,
- d) pruža stručne konsultantske usluge iz djelatnosti rada Instituta, a posebno iz oblasti sigurnosti hrane,
- e) ostvaruje stručnu i naučnu saradnju na međunarodnom planu,
- f) vrši naučno-istraživačku djelatnost,
- g) vrši nastavnu djelatnost u skladu sa odredbama Zakona o zdravstvenoj zaštiti,
- h) vrši procjenu higijenskih uslova u životnoj i radnoj sredini i njihovih uticaja na zdravlje,
- i) obavlja izdavačku djelatnost iz djelokruga svoga rada.

Član 10.

(Obavljanje drugih djelatnosti)

Pored djelatnosti upisane u sudski registar, Institut može obavljati i druge djelatnosti koje služe obavljanju djelatnosti upisane u sudski registar, ako se one u manjem obimu ili uobičajeno obavljaju uz upisanu djelatnost.

Član 11.

(Proširivanje i promjena djelatnosti)

- (1) Institut je osnovan i funkcioniše kao jedinstvena javna ustanova koja obavlja djelatnost u javnom interesu.
- (2) Institut može vršiti statusne promjene: spajanje, pripajanje, podjelu i izdvajanje, u skladu sa zakonom.
- (3) Odluku o statusnim promjenama iz stava (2) ovog člana donosi Upravni odbor, uz prethodnu saglasnost Osnivača.

Član 12.

(Saradnja sa državnim organima i fizičkim licima)

Institut u ostvarivanju svoje djelatnosti sarađuje sa državnim organima svih nivoa vlasti, pravnim i fizičkim licima u Zeničko-dobojskom kantonu, Federaciji Bosne i Hercegovine, Bosni i Hercegovini i inostranstvu.

Član 13.

(Unutrašnja organizacija)

(1) Unutrašnja organizacija Instituta osigurava kontinuirano i nesmetano obavljanje djelatnosti Instituta u oblasti javnog zdravstva kao i oblasti veterinarstva u skladu sa ovim zakonom, kao i zakonima iz ovih oblasti.

(2) Djelatnost Instituta obavlja se kroz organizacijske jedinice i to na takav način da u osnovnoj organizacionoj strukturi funkcionišu organizaciona jedinica pod nazivom Zavod za javno zdravstvo i organizaciona jedinica pod nazivom Veterinarski zavod, dok se kroz ostale organizacione jedinice mogu objediniti sve djelatnosti koje su zajedničke, opće, administrativne, tehničke, pomoćne i sl.

(3) Bliže odredbe o unutrašnjoj organizaciji Instituta će biti propisane Statutom Instituta i općim aktom donijetim na osnovu Statuta.

POGLAVLJE V. – IMOVINA I SREDSTVA INSTITUTA

Član 14.

(Imovina i finansiranje Instituta)

(1) Imovinu Instituta čine pokretne i nepokretne stvari nad kojima je pravo upravljanja imala JU Zavod za javno zdravstvo Zeničko-dobojskog kantona, prava i obaveze koje je stekla JU Zavod za javno zdravstvo Zeničko-dobojskog kantona prema bilansu stanja na dan upisa Instituta u sudski registar pravnih subjekata, a koji ujedno čine i primopredajni bilans, kao i novac i prava koja Institut stiče svojim poslovanjem.

(2) Ovim Zakonom osnivač se obavezuje da redovno u Budžetu Zeničko-dobojskog kantona Institutu, kao pravnom sljedniku Zavod za javno zdravstvo Zeničko-dobojskog kantona, osigurava sredstva u iznosu koji približno odgovara sredstvima utvrđenim u Budžetu Zeničko-dobojskog kantona za 2014. godinu u razdjelu 21, budžetska organizacija 01, potrošačka jedinica 0001 – Ministarstvo zdravstva - ekonomski kod 614300, subanalitika LAX 001 pozicija "Tekući transfer za vakcine"; subanalitika LAX 002 pozicija "Tekući transfer za deratizaciju"; subanalitika LAX 008 pozicija "Tekući transfer za Kantonalni zavod za javno zdravstvo".

(3) Sredstva iz stava (2) ovog člana će biti planirana u razdjeliku 21, budžetska organizacija 01, potrošačka jedinica 0001 – Ministarstvo zdravstva - ekonomski kod 614300 pozicije: „Tekući transfer za vakcine“, „Tekući transfer za deratizaciju“, „Tekući transfer za Institut za zdravlje i sigurnost hrane Zenica“.

Član 15.

(Sticanje sredstava za rad)

Sredstva za rad i razvoj Institut ostvaruje:

- a) ugovorom sa zavodom zdravstvenog osiguranja Federacije, odnosno kantona,
- b) ugovorom sa nadležnim ministarstvom zdravstva i ministarstvom za poljoprivredu, šumarstvo i vodoprivredu koji se na osnovu zakona finansiraju iz budžeta,
- c) ugovorom sa fakultetima i drugim visokim školama zdravstvenog i veterinarskog usmjerenja,
- d) ugovorom po osnovu proširenog i dobrovoljnog zdravstvenog osiguranja;
- e) iz sredstava osnivača u skladu s aktom o osnivanju,

- f) iz sredstava budžeta Federacije, kantona, odnosno opštine,
- g) iz učešća korisnika zdravstvene zaštite u pokriću dijela ili ukupnih troškova zdravstvene zaštite,
- h) prodajom usluga na tržištu,
- i) iz donacija i drugih sredstava namijenjenih za realizaciju projekata,
- j) iz drugih izvora na način i pod uslovima određenim Zakonom i Statutom Instituta.

Član 16.

(Korištenje viška prihoda nad rashodima)

Višak prihoda nad rashodima Institut koristi za obavljanje svoje djelatnosti, po odluci Upravnog odbora.

Član 17.

(Odgovornost za obaveze)

- (1) Institut za preuzete obaveze odgovara imovinom kojom raspolaže.
- (2) Osnivač ne odgovara za obaveze Instituta.
- (3) Osnivač je dužan obezbijediti Institutu adekvatan prostor za rad.

POGLAVLJE VI. – ORGANI UPRAVLJANJA I RUKOVOĐENJA

Član 18.

(Organ upravljanja)

- (1) Organ upravljanja Institutom je Upravni odbor.
- (2) Upravni odbor broji pet članova od kojih je jedan predsjednik.
- (3) Upravni odbor Instituta čine predstavnici:
 - a) osnivača - tri (3) člana
 - b) zaposlenika Instituta – dva (2) člana
- (4) Predsjednika i članove Upravnog odbora Instituta imenuje i razrješava Vlada Zeničko-dobojskog kantona, na prijedlog resornih ministarstava.
- (5) Postupak imenovanja i razrješenja predsjednika i članova Upravnog odbora vršiće Vlada Zeničko-dobojskog kantona saglasno ovom Zakonu, kao i propisima o ministarskim, vladinim i drugim imenovanjima.

Član 19.

(Mandat Upravnog odbora i slučajevi razrješenja

Predsjednika i člana Upravnog odbora prije isteka mandata)

- (1) Mandat članova Upravnog odbora traje četiri godine s mogućnošću reizbora.
- (2) Predsjedniku i članu Upravnog odbora može prestati mandat i prije isteka vremena od četiri godine u sljedećim slučajevima:
 - a) ako se ne pridržava uputa i smjernica Osnivača,
 - b) ako učestvuje u donošenju nezakonitih akata ili odluka kojima se nanosi šteta Institutu,
 - c) ako podnese ostavku na mjesto predsjednika, odnosno člana Upravnog odbora,
 - d) ako se utvrdi da je odgovoran za neuspješan i nezakonit rad Instituta,
 - e) ako u radu Upravnog odbora krši odredbe Statuta Instituta,
 - f) ako svojim radom onemogućava ili otežava rad Upravnog odbora,
 - g) ako mu prestane radni odnos u Institutu, a imenovan je za člana Upravnog odbora iz reda stručnih radnika Instituta,
 - h) ako član Upravnog odbora imenovan iz reda stručnih radnika učini težu povredu radne dužnosti,
 - i) imenovanjem za direktora;

- j) neopravdanim izostankom s dviju ili više sjednica uzastopno ili s dviju ili više sjednica u toku uzastopnih šest (6) mjeseci,
 - k) ako bude uposlen na drugoj izabranoj poziciji koja može utjecati na eventualni sukob interesa,
 - l) smrću.
- (3) Prijedlog za opoziv predsjednika i člana Upravnog odbora mogu podnijeti, ministar zdravlja, ministar za poljoprivredu, šumarstvo i vodoprivredu i Upravni odbor.
- (4) Prije upućivanja rješenja o razrješenju predsjednika, odnosno člana Upravnog odbora Vladi Zeničko-dobojskog kantona, u slučajevima iz stava (2) ovog člana, resorna ministarstva su dužna zajednički obavijestiti predsjednika, odnosno člana Upravnog odbora čiji se opoziv traži i dati mu mogućnost da se o njoj izjasni u pisanoj formi.

Član 20.

(Nadležnosti Upravnog odbora)

Upravni odbor obavlja sljedeće poslove i zadatke:

- a) donosi Statut Instituta,
- b) na prijedlog direktora, donosi opšte akte o unutrašnjoj organizaciji i sistematizaciji poslova, kao i druge opšte akte saglasno Zakonu i Statutu Instituta,
- c) utvrđuje planove rada i razvoja Instituta,
- d) utvrđuje godišnji program rada Instituta,
- e) donosi finansijski plan, kao i rebrans finansijskog plana, te usvaja godišnji obračun,
- f) usvaja godišnji plan nabavki Instituta,
- g) usvaja izvještaj o planu javnih nabavki Instituta,
- h) donosi godišnji plan rada Upravnog odbora i godišnji izvještaj o radu Upravnog odbora,
- i) odlučuje, uz saglasnost osnivača, o promjeni naziva i sjedišta Instituta,
- j) predlaže osnivačima promjenu i proširenje djelatnosti, te statusne promjene,
- k) odlučuje o raspisivanju javnog oglasa za postavljanje direktora Instituta,
- l) imenuje i razrješava direktora, odnosno v.d. direktora Instituta,
- m) odlučuje o svim pitanjima obavljanja djelatnosti radi kojih je Institut osnovan, ako zakonom nije određeno da o određenim pitanjima odlučuje drugi organ Instituta,
- n) usmjerava, kontroliše i ocjenjuje rad direktora Instituta,
- o) odlučuje o raspolaganju u pravnom prometu nepokretnom imovinom, uz saglasnost Osnivača,
- p) na prijedlog direktora, odlučuje o korištenju zajmova i kredita za investicijska ulaganja i održanje tekuće likvidnosti,
- r) na prijedlog direktora, donosi godišnju odluku o utvrđivanju viška prostora i opreme Instituta za davanje u zakup, a uz prethodne saglasnosti kantonalnog ministra zdravlja i kantonalnog ministra za poljoprivredu, šumarstvo i vodoprivredu,
- s) na prijedlog direktora, odlučuje o raspodjeli dobiti za obnavljanje i razvoj djelatnosti,
- t) na prijedlog direktora, odlučuje o zaključivanju ugovora sa nadležnim zavodima zdravstvenog osiguranja, kao i ugovorima o naučnoj, odnosno stručnoj saradnji u BiH, kao i u inostranstvu,
- u) odlučuje u drugom stepenu po prigovoru na akte kojima se odlučuje o pojedinim pravima zaposlenika iz radnog odnosa,
- v) rješava sva pitanja odnosa s osnivačem,
- z) odgovara osnivaču za rezultate rada ustanove,
- aa) podnosi osnivaču izvještaj o radu najmanje jedanput godišnje,
- ab) obavlja i druge poslove saglasno Zakonu i Statutu Instituta.

Član 21.

(Nadležnosti direktora)

- (1) Organ rukovođenja Instituta je direktor.
- (2) Direktor obavlja sljedeće poslove i zadatke:
 - a) organizira i rukovodi radom Instituta,
 - b) predstavlja i zastupa Institut prema trećim licima,
 - c) predlaže unutrašnju organizaciju i sistematizaciju Instituta,
 - d) stara se o izvršavanju odluka Upravnog odbora,
 - e) predlaže osnove plana rada i razvoja,
 - f) stara se o primjeni finansijskih propisa u poslovanju Instituta i naredbodavac je za izvršenje finansijskog plana,
 - g) podnosi Upravnom odboru izvještaj o rezultatima rada i finansijskog poslovanja, te poduzima mjere za uspješno poslovanje, unapređenje organizacije i procesa rada,
 - h) učestvuje u radu Upravnog odbora bez prava odlučivanja,
 - i) pokreće postupak donošenja i usuglašavanja općih akata Instituta, te daje prijedloge istih prema Upravnom odboru,
 - j) odlučuje o potrebi prijema radnika, saglasno finansijskim mogućnostima Instituta, zaključuje ugovore o radu, vrši raspoređivanje radnika na radna mjesta u skladu sa Pravilnikom o unutrašnjoj organizaciji i sistematizaciji radnih mjesta Instituta, odlučuje o trajanju, prestanku i otkazu ugovora o radu,
 - k) odlučuje u prvom stepenu o pravima i obavezama radnika iz rada i u vezi sa radom, a saglasno Zakonu o radu, kolektivnom ugovoru, Statutu i drugim općim aktima Instituta,
 - l) određuje i izriče disciplinske mjere u prvom stepenu protiv zaposlenika Instituta,
 - m) izdaje naloge i upute za rad pojedinih organizacionih jedinica, radnika ili grupe radnika, a radi izvršenja određenih poslova,
 - n) po potrebi obrazuje komisije, radne i stručne grupe i druga radna i savjetodavna tijela radi razrade određenih pitanja, izrade studija, analiza, prijedloga, stručnih mišljenja i sl.,
 - o) sprovodi opće akte koji po svom sadržaju spadaju u nadležnost direktora Instituta,
 - p) obavlja i ostale poslove utvrđene Zakonom, Statutom i drugim općim aktima Instituta.

Član 22.

(Imenovanje direktora)

- (1) Direktora Instituta, nakon objavljenog konkursa u sredstvima javnog informisanja, imenuje Upravni odbor na period od četiri (4) godine, sa mogućnošću reizbora.
- (2) Odluka o imenovanju direktora Instituta iz stava 1. ovog člana podliježe obaveznoj prethodnoj saglasnosti kantonalnog ministra zdravstva i kantonalnog ministra za poljoprivredu, šumarstvo i vodoprivredu.
- (3) Bliži uvjeti za direktora Instituta, kao i način i postupak provođenja konkursa za izbor i imenovanje direktora će se regulirati Statutom Instituta.

Član 23.

(Razrješenja direktora prije isteka mandata)

- (1) Direktor može biti razriješen i prije isteka mandata na koji je imenovan.
- (2) Upravni odbor dužan je razriješiti direktora i prije isteka mandata za koji je izabran ako:
 - a) direktor to lično zahtijeva,
 - b) nastane neki od razloga koji po posebnim propisima ili propisima kojima se uređuju radni odnosi dovode do prestanka ugovora o radu,
 - c) u obavljanju djelatnosti Instituta nastane neopravdani gubitak,

- d) u svom radu krši propise i opće akte Instituta ili neopravdano ne izvršava odluke Upravnog odbora ili postupaju u suprotnosti s njima,
 - e) svojim nesavjesnim ili nepravilnim radom prouzrokuje Institutu veću štetu, zanemaruje ili nemarno obavlja svoju dužnost tako da su nastale ili mogu nastati veće smetnje u obavljanju djelatnosti Instituta.
- (3) Protiv rješenja iz stava 2. ovog člana nije dopuštena žalba, ali se može pokrenuti upravni spor.
- (4) Upravni odbor mora, prije donošenja odluke o razrješenju, obavijestiti direktora o razlozima za razrješenje i dati mu mogućnost da se o njoj izjasni u pisanoj formi.

POGLAVLJE VII. – OPĆI AKTI

Član 24.

(Opći akti)

- (1) Osnovni opći akt Instituta je Statut.
- (2) Statut donosi Upravni odbor, uz saglasnost Vlade Zeničko-dobojskog kantona.
- (3) Osim Statuta, Institut ima i druge opće akte, kojima se uređuju unutarnji odnosi, organizacija rada i poslovanja, te ostala pitanja značajna za obavljanje djelatnosti Instituta.

Član 25.

(Dejstvo općih akata)

- (1) Opći akti stupaju na snagu danom donošenja.
- (2) Opći akti ne mogu imati retroaktivno dejstvo.

Član 26.

(Tumačenje Statuta i drugih općih akata)

Tumačenje pojedinih odredbi Statuta i drugih općih akata daje Upravni odbor odnosno direktor, u zavisnosti da li je pojedinačni opći akt donio Upravni odbor ili direktor.

POGLAVLJE VIII. - JAVNOST RADA I PRISTUP INFORMACIJAMA U POSJEDU INSTITUTA, KAO I ČUVANJE POSLOVNE TAJNE

Član 27.

(Javnost rada Instituta)

- (1) Rad Instituta je javan.
- (2) Javnost rada Instituta se osigurava na način i pod uslovima utvrđenim Statutom i drugim općim aktima Instituta.

Član 28.

(Izveštavanje)

Izveštaji o radu Instituta redovno se dostavljaju osnivaču, Vladi Zeničko-dobojskog kantona, a po potrebi drugim resornim ministarstvima i drugim organima i institucijama kad je to predviđeno propisima i kada na posredan ili neposredan način imaju interesa za djelatnost Instituta.

Član 29.

(Ovlaštenja za davanje informacija)

Izveštaje i saopštenja za javnost može dati Upravni odbor, direktor ili osoba koju ovlasti direktor.

Član 30.

(Način saopštavanja informacija)

- (1) Informacije u posjedu Instituta mogu se saopštavati i fizičkim i pravnim licima u postupku i na način propisan Zakonom o slobodi pristupa informacijama u Federaciji Bosne i Hercegovine.
- (2) Informacije u posjedu Instituta iz stava 1. ovog člana saopštava direktor ili osoba koju direktor ovlasti.

Član 31.

(Neovlašteno davanje informacija)

Neovlašteno davanje informacija u posjedu Instituta predstavlja težu povredu radne obaveze.

Član 32.

(Poslovna tajna)

Poslovnom tajnom smatraju se isprave i podaci čije bi saopštavanje ili davanje na uvid neovlaštenoj osobi bilo protivno poslovanju Instituta ili štetilo njegovom ugledu, odnosno interesu ili ugledu zaposlenih, te štetilo generalno politici poslovanja i poslovnim potezima Instituta.

Član 33.

(Čuvanje poslovne tajne)

- (1) Poslovnu tajnu dužni su čuvati zaposlenici Instituta koji na bilo koji način saznaju za ispravu ili podatak koji se smatra poslovnom tajnom i to i po prestanku rada u Institutu, a najmanje pet godina računajući od dana prestanka radnog odnosa u Institutu.
- (2) Poslovnu tajnu iz stava 1. ovog člana dužni su čuvati i članovi Upravnog odbora, te drugih imenovanih organa i tijela Instituta, a najmanje pet godina računajući od dana prestanka obavljanja funkcije u navedenom organu ili tijelu.

Član 34.

(Dokumenti koji se smatraju poslovnom tajnom)

Poslovnom tajnom posebno se smatraju:

- a) dokumenti koje direktor proglasi poslovnom tajnom,
- b) podaci koje nadležna tijela kao povjerljive saopšte Institutu,
- c) mjere i način postupanja u slučaju nastanka vanrednih okolnosti.

Član 35.

(Čuvanje poslovne tajne)

- (1) O čuvanju poslovne tajne neposredno brine direktor.
- (2) Isprave i podaci koji se smatraju poslovnom tajnom ne mogu se neovlašteno saopštavati, niti činiti dostupnim neovlaštenim osobama.

POGLAVLJE IX. - VOĐENJE EVIDENCIJA

Član 36.

(Vođenje evidencija)

- (1) U svrhu osiguranja podataka potrebnih za sprovođenje djelatnosti i nadzora nad pruženim uslugama, u Institutu se vode evidencije propisane federalnim propisima.
- (2) Institut se obavezuje da prilikom vođenja evidencija iz stava (1) ovog člana štiti tajnost ličnih podataka pacijenta saglasno propisima o zaštiti ličnih podataka.

Član 37.

(Čuvanje arhivske građe)

Sva finansijska dokumentacija, podaci o investicijskom ulaganju, projekti, planovi, zapisnici organa upravljanja i rukovođenja, kao i drugi dokumenti čuvaju se saglasno propisima o čuvanju arhivske građe.

Član 38.

(Čuvanje medicinske dokumentacije)

Medicinska dokumentacija je trajne vrijednosti i ne može se uništiti ni otuđiti bez znanja i odobrenja ovlaštenog organa za čuvanje arhivske građe.

POGLAVLJE X. – PRELAZNE I ZAVRŠNE ODREDBE

Član 39.

(Imenovanje Upravnog odbora i direktora)

- (1) Vlada Zeničko-dobojskog kantona će u roku od 15 (petnaest) dana od dana stupanja na snagu ovog Zakona, imenovati privremeni Upravni odbor Instituta saglasno ovom Zakonu, kao i propisima o ministarskim, vladinim i drugim imenovanjima u Federaciji Bosne i Hercegovine.
- (2) Vlada Zeničko-dobojskog kantona će u roku od 15 (petnaest) dana od dana stupanja na snagu ovog Zakona imenovati VD direktora Instituta saglasno ovom Zakonu.
- (3) VD direktora Instituta dužan je preduzeti sve potrebne radnje za upis Instituta u sudski registar, kao i gašenje Zavoda za javno zdravstvo Zeničko-dobojskog kantona u sudskom registru.

Član 40.

(Preuzimanje zatečenih zaposlenika)

- (1) Sve zatečene zaposlenike Zavoda za javno zdravstvo Zeničko-dobojskog kantona preuzima Institut.
- (2) VD direktora će u roku od 15 dana od dana početka rada Instituta preuzetim zaposlenicima Zavoda za javno zdravstvo Zeničko-dobojskog kantona ponuditi zaključenje ugovora o radu s privremenim rasporedom do donošenja Pravilnika o unutrašnjoj organizaciji i sistematizaciji radnih mjesta Instituta.

Član 41.

(Primopredaja službenih akata)

Primopredaja službenih akata između Zavoda za javno zdravstvo Zeničko-dobojskog kantona, s jedne strane i Instituta, s druge strane, izvršit će se u skladu sa Odlukom Vlade Zeničko-dobojskog kantona.

Član 42.

(Rok za donošenje općih akata)

Nakon imenovanja privremenog Upravnog odbora i vršioca dužnosti direktora, Upravni odbor će, na prijedlog VD direktora, u roku od 30 dana donijeti Statut Instituta, a u roku od 60 dana Pravilnik o radu i Pravilnik o unutrašnjoj organizaciji i sistematizaciji radnih mjesta Instituta.

Član 43.

(Status imovine)

Institut zadržava pravo korištenja državne imovine koju je koristila JU Zavod za javno zdravstvo Zeničko-dobojskog kantona.

Član 44.

(Zakon kao osnivački akt)

(1) Ovaj Zakon predstavlja osnivački akt na osnovu kojeg će se Institut upisati u sudski registar kod nadležnog suda.

(2) Ovlašćuje se Upravni odbor da saglasno ovom Zakonu donese odluku kojom će bliže odrediti djelatnost Instituta, kao i šifre djelatnosti u skladu sa važećom klasifikacijom djelatnosti u BiH.

Član 45.

(Stavljanje van snage Odluke)

Stupanjem na snagu ovog Zakona stavlja se van snage Odluka o preuzimanju prava i obaveza osnivača i usklađivanju organizacije i poslovanja Javne ustanove Kantonalni zavod za javno zdravstvo («Službene novine Zeničko-dobojskog kantona» broj 11/12).

Član 46.

(Objavljivanje i stupanje na snagu)

Ovaj Zakon stupa na snagu sljedećeg dana od dana objavljivanja u „Službenim novinama Zeničko-dobojskog kantona“.

Broj: _____

Datum: 2015. godine

**P R E D S J E D A V A J U Ć A
S K U P Š T I N E**

Draženka Subašić s.r.

O b r a z l o ž e n j e

Zakona o osnivanju Javne ustanove Institut za zdravlje i sigurnost hrane Zenica

I - USTAVNI OSNOV

Ustavni osnov za donošenje ovog Zakona sadržan je u Poglavlju V član 37. tačka f) i član 18. tačka f) Ustava Zeničko-dobojskog kantona.

Saglasno članu 37. tačka h) Ustava Zeničko-dobojskog kantona, Skupština Kantona donosi zakone i ostale propise za izvršavanje kantonalnih nadležnosti, članom 18. tačka f) citiranog Ustava utvrđeno je da je u nadležnosti Kantona utvrđivanje politike koja se tiče reguliranja i osiguranja javnih službi. Pod javnim službama se smatraju ustanove, javna preduzeća i drugi oblici organizovanja utvrđeni zakonom, koji obavljaju djelatnosti od općeg interesa kojim se obezbjeđuje ostvarivanje prava i dužnosti fizičkih i pravnih lica, kao i ostvarivanje drugog zakonom utvrđenog interesa.

Polazeći od naprijed navedenog, Skupština Zeničko-dobojskog kantona osniva JU Institut za zdravlje i sigurnost hrane Zenica, na koju prenosi djelatnost, ovlaštenja i nadležnosti zavoda za javno zdravstvo kantona, kao i djelatnost i nadležnosti veterinarskog zavoda kantona koji je do sada poslovao kao kantonalna upravna organizacija u sastavu Ministarstva poljoprivrede, vodoprivrede i šumarstva Zeničko-dobojskog kantona.

Obzirom da Veterinarski zavod nije pravno lice nego dio Ministarstva za poljoprivredu, šumarstvo i vodoprivredu Zeničko-dobojskog kantona, posebnim zakonom će se prenijeti javna ovlaštenja ovog ministarstva iz oblasti veterinarske djelatnosti na Institut za zdravlje i sigurnost hrane Zenica.

Cijeneći da je u oblasti zdravstva i poljoprivrede Ustavom Federacije BiH predviđena podijeljena nadležnost između federalne vlasti i kantona, Ministarstvo zdravstva Zeničko-dobojskog kantona je od Federalnog ministarstva zdravstva zatražilo pojašnjenje usklađenosti ideje o udruživanju Zavoda za javno zdravstvo Zeničko-dobojskog kantona i Veterinarskog zavoda sa postojećom zakonskom regulativom u oblasti zdravstva, te da li postoje zakonske prepreke ovakim namjerama Vlade Zeničko-dobojskog kantona.

Federalno ministarstvo zdravstva je, svojim aktom broj 06-37-2384/13, od 23.05.2013. godine, odgovorilo da je postojeći Zakon o zdravstvenoj zaštiti („Službene novine Federacije BiH“, br. 46/10 i 75/13) predvidio formiranje zavoda za javno zdravstvo kantona, što u našem slučaju nije primjenjivo. Naravno nije ni za očekivati da Zakon o zdravstvenoj zaštiti reguliše ovakvu specifičnu situaciju. Stoga je Federalno ministarstvo ukazalo na odredbe Zakona o ustanovama (Službeni list RBiH, br. 6/92, 8/94 i 13/94) kao lex specialis, koji između ostalog, definira osnivanje, djelatnost, statusne promjene i udruživanje ustanova. Članom 14. Zakona o ustanovama predviđena je mogućnost da ustanova može proširiti ili promijeniti djelatnost, kao i vrstu statusne promjene: spajanje, pripajanje, podjelu i izdvajanje. Odluku iz stava 1. ovog člana donosi osnivač.

Nadalje članom 10. Zakona o ustanovama predviđena je mogućnost da ustanova može obavljati više djelatnosti iz člana 1. Zakona o ustanovama (djelatnosti obrazovanja, nauke, kulture, fizičke kulture, zdravstva, dječije zaštite, socijalne zaštite, socijalne sigurnosti i drugih djelatnosti utvrđenih zakonom), ako ispunjavaju uslove utvrđene zakonom za svaku od tih djelatnosti. Ova odredba ukazuje da ustanova može obavljati više djelatnosti što bi bilo primjenjivo na novoformiranu ustanovu koja se osniva ovim Zakonom, i to nastalu

spajanjem Zavoda za javno zdravstvo Zeničko-dobojskog kantona i Veterinarskog zavoda kantona, te koja bi na osnovu saglasno citiranom članu zakona o ustanovama, obavljala više djelatnosti, zdravstvenu i veterinarsku.

Iz navedenog proizilazi da je u okviru postojeće zakonske regulative u oblasti zdravstva definirana samo mogućnost organiziranja određenih zajedničkih službi između zdravstvenih ustanova, a da se saglasno odredbama Zakona o ustanovama ostavlja mogućnost spajanja ustanova, odnosno proširenja djelatnosti.

Obzirom da je u oblasti poljoprivrede Ustavom Federacije BiH predviđena podijeljena nadležnost između federalne vlasti i kantona, Ministarstvo za poljoprivredu, šumarstvo i vodoprivredu Zeničko-dobojskog kantona je od Federalnog ministarstva za poljoprivredu, vodoprivredu i šumarstvo zatražilo pojašnjenje usklađenosti ideje o udruživanju Zavoda za javno zdravstvo Zeničko-dobojskog kantona i Veterinarskog zavoda sa postojećom zakonskom regulativom u oblasti veterinarstva, te da li postoje zakonske prepreke ovakim namjerama Vlade Zeničko-dobojskog kantona.

Federalno ministarstvo za poljoprivredu, vodoprivredu i šumarstvo je svojim aktom broj 06-2-24/18-2679/14 od 23.09.2014. odgovorilo da je članom 10 Uredbe sa zakonskom snagom o ustanovama propisano da ustanove mogu obavljati više djelatnosti, ako ispunjavaju uslove utvrđene zakonom za svaku od tih djelatnosti. Odredbama člana 14. navedene Uredbe propisano je da ustanova može proširiti ili promijeniti djelatnost, kao i vrstu statusne promjene: spajanje, pripajanje, podjelu i izdvajanje, a odluku o tome donosi osnivač. Takođe u članu 17. pomenute Uredbe, navedeno je da ustanove udružene u zakonom propisani oblik udruživanja zadržavaju svojstvo pravnog lica. U skladu sa odredbama navedene Uredbe, te analizom odgovora Federalnom ministarstvu zdravstva na istovjetan upit broj 06-37-2384/13 od 23.05.2013.godine, kao i važećih propisa iz oblasti veterinarstva, i ovo federalno ministarstvo smatra da nema zakonske prepreke za udruživanje Zavoda za javno zdravstvo Zeničko-dobojskog kantona i Veterinarskog zavoda Zenica.

II - RAZLOZI ZA DONOŠENJE

Zaštita zdravlja ljudi i životinja naizgled su odvojene oblasti, ali u suštini usko su povezane. Samo od zdravih životinja uzgojenih u ekološki zdravoj sredini, možemo proizvesti zdravu hranu animalnog porijekla. Zdravlje životinja je vrlo bitno sa ekonomskog stanovišta, ali je još važniji uticaj na zdravlje ljudi, sa stanovišta konzumiranja hrane i direktnog kontakta sa životinjama, kako domaćim tako i divljim. Mnoge zarazne i parazitarne bolesti se prenose i šire sa životinja na ljude hranom i neposrednim kontaktom, te su zajedničke i životinjama i ljudima (zoonoze). Primjer vrlo opasnih zoonoza sa kojima se susrećemo su bjesnilo, bruceloza, tuberkuloza, antraks i mnoge druge koje predstavljaju svakodnevnu opasnost za zdravlje ljudi.

EU iskustva

Europska komisija, kao svojevrsna vlada EU, je podijeljena u nekoliko odjela i službi. Odjeli su poznati kao Glavne uprave i ima ih 33.

Jedna od tih Glavnih uprava (DG - directorate Generale) je nadležna za zdravlje i sigurnost hrane - DG Health and Food safety (DG SANTE).

Ova Glavna uprava (ministarstvo) je nadležna za zdravlje (javno zdravlje), sigurnost hrane, zdravlje životinja i zdravlje biljaka.

Zadatak ove Uprave je da:

- zaštititi i unaprijediti javno zdravlje
- osigura Europsku hranu sigurnom i zdravom
- zaštititi zdravlje i dobrobit uzgajanih životinja
- zaštititi zdravlje usjeva i šuma

Organizaciona struktura ove Glavne direkcije pokazuje njene odjele:

- Public health (javno zdravlje)
- Health system end products (Zdravstveni sistem i proizvodi)
- Safety of the food chain (Sigurnost lanca hrane)
- Food and Veterinary Office (Ured za hranu i veterinarstvo)
- Veterinary and International affairs (Veterinarski i međunarodni poslovi)

Ovo pokazuje potpunu opravdanost objedinjavanja djelatnosti javnog zdravstva i veterine kroz zajedničke kapacitete. Zavod za javno zdravstvo kantona se upravo bavi javnim zdravljem u smislu kontrole bolesti i rizika po zdravlje, kao i zdravstvenim sistemom (socijalna medicina i organizacija zdravstva), kao i dijelom sigurnošću hrane, dok se veterinarski zavod kantona bavi sigurnošću hrane i zdravljem životinja.

Koncept One Health - Jedno zdravlje

Dodatnu opravdanost nalazimo i u globalnoj inicijativi jednog zdravlja - One health initiative. Inicijativa jedno zdravlje će ujediniti humanu i veterinarsku medicinu.

Ova inicijativa je pokrenuta u USA od strane Američke medicinske asocijacije, Američkog veterinarskog liječničke asocijacije, Američke akademije za pedijatriju, Američkog udruženja medicinskih sestara, Američkog udruženja liječnika javnog zdravstva, Američkog društva za tropsku medicinu i higijenu, Centra za kontrolu bolesti (CDC), Ministarstva poljoprivrede USA, Američke asocijacije za zdravlje okoliša. Nakon što je pokrenuta u Sjedinjenim Američkim Državama, ova inicijativa je dobila globalnu podršku.

Koncept "Jedno zdravlje" je globalna strategija za širenje interdisciplinarne saradnje i komunikacije u svim aspektima zaštite zdravlja ljudi i životinja i okoliša. Ovaj sinergizam će unaprijediti zdravstvenu zaštitu ubrzavajući biomedicinska istraživanja, unaprijediti efikasnost javnog zdravstva, proširiti bazu naučnih znanja i unaprijediti medicinsku edukaciju i kliničku njegu. Ispravno implementiran koncept „Jedno zdravlje“ će pomoći zaštititi i spašavanju nebrojenih miliona života u sadašnjosti i budućnosti.

U globalnu inicijativu "Jedno zdravlje" uključio se i Univerzitet u Sarajevu kroz Veterinarski fakultet i Medicinski fakultet.

Preventivna zaštita zdravlja ljudi, preventivna zaštita zdravlja životinja, laboratorijska dijagnostika zaraznih bolesti, parazitarne oboljenja, laboratorijska kontrola zdravstvene ispravnosti hrane i prisustva rezidua veterinarskih lijekova i drugih kemijskih štetnih tvari u hrani, zajednički je zadatak i medicine i veterine, a sve u cilju očuvanja zdravlja ljudi.

Značajan dio djelatnosti veterinarskog zavoda je veterinarsko javno zdravstvo, kojeg Svjetska zdravstvena organizacija definiše na sljedeći način: **Veterinarsko javno zdravstvo je skup svih doprinosa kompletnom fizičkom, mentalnom i socijalnom blagostanju ljudi kroz razumijevanje i aplikaciju veterinarske nauke i struke.**

Javno zdravstvo i veterina često su u konkurenciji baveći se laboratorijskim ispitivanjima zdravstvene ispravnosti hrane. Ta djelatnost zahtijeva dobre i kvalitetne laboratorije usklađene sa međunarodnim standardima. Kako su obje ustanove u javnom vlasništvu, možemo imati situaciju da država (kanton) ulažu u oba laboratorija, da bi se oni međusobno natjecali na tržištu uz samo djelimično iskorištavanje svog potencijala. Oba ova zavoda su započela sa procesom akreditacije svojih laboratorija, a kvalitetnog stručnog kadra za laboratorijsku dijagnostiku nema previše.

Zbog toga bi bilo korisno i racionalno objediniti službe i odjeljenja koja trebaju za oba ova kantonalna zavoda, ali na taj način da one čine funkcionalnu cjelinu. Tako bi se postigla znatno bolja iskorištenost kapaciteta, kao i mogućnost daljeg razvoja u pravcu specijaliziranja unutar djelatnosti. Objedinjavanjem laboratorija znatno bi se ubrzao i pojeftinio proces akreditacije po standardu ISO 17025.

Objedinjavanje laboratorija neće utjecati na ostale stručne djelatnosti koje su specifične za Zavod za javno zdravstvo Zeničko-dobojskog kantona i Veterinarski zavod kantona.

Na drugoj strani, objedinjavanjem laboratorija, kao i osnovnih službi ova dva zavoda, znatno bi se ojačali kapaciteti za implementaciju projekata koji bi se finansirali iz EU fondova. Mogući prostor za ove projekte su fondovi za ekologiju, zdravlje, proizvodnju hrane i naučna istraživanja, što su najviše finansirane oblasti. Ovim bi se na prostoru Centralne Bosne u značajnoj mjeri stvorili kapaciteti za implementaciju EU standarda u oblasti zdravlja, proizvodnje hrane, ekologije. Primjena Europskih standarda zaštite zdravlja ljudi kroz zaštitu životinja i biljaka bi trebalo poboljšati konkurentnost naših proizvođača hrane na Europskom i Svjetskom tržištu.


Vlada Zeničko-dobojskog kantona je na 86. sjednici, održanoj 16.11.2012. godine usvojila Zaključak kojim se zadužuju Ministarstvo zdravstva i Ministarstvo za poljoprivredu, vodoprivredu i šumarstvo da pripreme prijedlog objedinjavanja laboratorijskih i stručnih kapaciteta Veterinarskog zavoda i Zavoda za javno zdravstvo Zeničko-dobojskog kantona u cilju efikasnijeg vršenja njihovih djelatnosti.

Vlada Zeničko-dobojskog kantona je ponovno na 174. sjednici, održanoj 25.07.2014. godine, usvojila Zaključak, broj 02-05-15149/14, kojim se zadužuju Ministarstvo zdravstva, Ministarstvo za poljoprivredu, šumarstvo i vodoprivredu, Zavod za javno zdravstvo Zeničko-dobojskog kantona i Veterinarski zavod da organizuju zajednički sastanak na temu reorganizacije zavoda u cilju jedinstvenog djelovanja i objedinjavanja laboratorija. Ovim je Vlada obnovila aktivnosti na spajanju ova dva zavoda u jedinstvenu ustanovu.

Udruživanjem ovih ustanova zadržala bi se djelatnost svake od ovih institucija, kako bi se obje funkcije mogle izvršavati u zakonima predviđenom obimu i vrsti.

Udružena javna ustanova će nositi naziv Institut za zdravlje i sigurnost hrane Zenica. Cilj spajanja ovih institucija je racionalno korištenje laboratorijskih kapaciteta, koji su dijelom specifični za svaki od zavoda (Laboratorij za medicinsku mikrobiologiju u Zavodu za javnozdravstvo Zeničko-dobojskog kantona i Laboratorij za zdravlje životinja u Veterinarskom zavodu), a dijelom su zajednički za oba zavoda (Laboratorij za hranu i vodu). Osnivač oba zavoda je Zeničko-dobojski kanton i intencija Kantona jeste racionalno korištenje raspoloživih resursa i racionalan razvoj ovih kapaciteta u budućnosti.

Osnovna organizaciona shema Instituta



Dakle, oba zavoda (za javno zdravstvo i veterinarski) će nastaviti djelovati u okviru svojih zakonima propisanih djelatnosti, ovlaštenja i nadležnosti, kao i standardnom unutrašnjom organizacionom strukturom. Jedino će ovim udruživanjem u jednu ustanovu, biti objedinjeni zajednički kapaciteti (administracija, logistika, laboratorijska dijagnostika, edukacioni centar).

I do sada je bila praksa u oba zavoda (kao i u drugim sličnim ustanovama u BiH), da se pojedine laboratorijske pretrage rade u nekim drugim laboratorijama (outsourcing), kada vlastiti laboratorij nema mogućnosti da uradi određenu pretragu.

Racionalizacija objedinjavanja laboratorija se ogleda u sljedećem:

Ukoliko bi ove dvije ustanove nastavile djelovati samostalno, svaka od njih bi morala uložiti znatna sredstva u laboratorijske kapacitete, kako bi bile sposobne funkcionisati na tržištu laboratorijskih usluga (analize hrane). Procjena tih dodatnih ulaganja u Veterinarskom zavodu bi bila oko 800.000 KM, uz dodatno zapošljavanje 2 inženjera hemije (preko 50.000 KM godišnje samo za plate i naknade, kao i doprinose). Dodatna ulaganja u Zavodu za javno zdravstvo Zeničko-dobojskog kantona bi mogla biti oko 550.000 KM.

Objedinjavanjem ova dva laboratorija bi se potrebe za ulaganjima svele, umjesto 1.350.000 KM, na oko 850.000 KM, pa je dakle ušteda na ovom planu najmanje 500.000 KM.

Oba laboratorija moraju se akreditovati prema ISO 17025, što otprilike košta oko 50.000 KM za svaku ustanovu. Ovdje bi za iste metode dva Zavoda potrošila najmanje $2 \times 50.000 = 100.000$ KM, umjesto 50.000 KM (Ušteda najmanje 50.000 KM)

Najvažniji razlog za objedinjavanje ovih laboratorijskih kapaciteta jeste u povećanoj konkurentnosti objedinjenog laboratorija, te time mogućnost ostvarenja većeg prihoda na tržištu, što bi rezultiralo i mogućnosti otvaranja novih produktivnih radnih mjesta.

Dakle, minimalna ušteda bi mogla biti oko 550.000 KM javnih sredstava.

Pregled uticaja formiranja Instituta na djelatnost javnog zdravstva i veterine na Kantonu je sadržan u sljedećoj tabeli:

	JAVNO ZDRAVSTVO	VETERINA
Šta zadržava	- Kompletna djelatnost javnog zdravstva - Potpuna profesionalna autonomija u javnom zdravstvu - Ekskluzivitet nad specifičnom laboratorijskom dijagnostikom (npr. medicinska mikrobiologija)	- Kompletna djelatnost veterine - Potpuna profesionalna autonomija u oblasti veterine - Ekskluzivitet nad specifičnom laboratorijskom dijagnostikom (npr. Laboratorij za mlijeko, lab.za zdravlje životinja)
Šta dobija	- uštede u adaptaciji prostora - uštede u nabavci opreme - uštede u procesu akreditacije - olakšano dobijanje ovlaštenja za laboratorij za hranu - povećanje dostupnosti usluga na tržištu - povećanje prihoda - povećanje raspoloživog prostora - novo produktivno zapošljavanje - gubitak jednog jakog konkurenta - unapređenje saradnje u oblasti antropozoonoza	- uštede u adaptaciji prostora - uštede u nabavci opreme - uštede u procesu akreditacije - povećanje dostupnosti usluga na tržištu - povećanje prihoda - novo produktivno zapošljavanje - gubitak jednog jakog konkurenta - unapređenje saradnje u oblasti antropozoonoza - širenje djelatnosti u oblasti prevencije u veterini
Šta gubi	- ekskluzivitet nad laboratorijem za hranu Zavoda za javno zdravstvo Zeničko-dobojskog kantona	- ekskluzivitet nad laboratorijem za hranu Veterinarskog zavoda kantona

PROCJENA POTREBNIH RESURSA

Prostor

Postojeća dva Zavoda koriste oko 1.400 m² prostora, što nije zadovoljavajuće za potrebe razvoja Instituta. Potrebno je obezbjediti dodatnih oko 1.000 m², za šta ima mogućnosti u prostoru Univerziteta u Zenici (Metalurški institut). Međutim ovaj dodatni prostor nije uslov za rad, nego uslov za dalji razvoj Instituta i njegovo bolje pozicioniranje na tržištu, kao i za razvoj stručnih i naučno-istraživačkih kapaciteta.

Oprema

U početku će se koristiti postojeća oprema kantonalnih institucija (Zavod za javno zdravstvo Zeničko-dobojskog kantona i Veterinarski zavod). Potrebno je dodatno nabaviti laboratorijske, kao i druge opreme (zamjena dotrajale i nabavka nove). Ovdje treba naglasiti da je nabavka opreme neophodna u oba postojeća zavoda bez obzira na proces spajanja. Osnivanjem Instituta za zdravlje i sigurnost hrane, upravo će se racionalizirati nabavka opreme, jer se neće nabavljati dupla oprema za dvije ustanove. Izbjegavanje nabavke duple opreme će omogućiti nabavku neke opreme koja omogućava pružanje novih usluga.

Ljudski resursi za početak rada

U početku će se koristiti kadrovski potencijali pretpostavljenih članica Instituta. Zavod za javno zdravstvo i Veterinarski zavod imaju trenutno 81 zaposlena, od čega je 15 doktora medicine i doktora veterine, te 9 stručnih VSS radnika, 25 stručnih VŠS radnika i 6 administrativna VSS radnika.

Ova dva zavoda imaju 5 doktora nauka i 3 magistra nauka, što čini 10% svih zaposlenih.

Dakle od ukupno 81 zaposlena 15 je doktora medicine i veterine (18,5%), ukupno 30 zaposlenih sa VSS (37%) i ukupno 55 zaposlenih sa univerzitetskim obrazovanjem (68%).

Ovaj kadrovski potencijal je više nego dovoljan da uspješno obavi funkciju Instituta, uz naravno prijem novih kadrova kako to uvođenje novih laboratorijskih metoda i drugih poslova bude zahtijevalo.

Izvori finansiranja rada Instituta

- Prodaja usluga na tržištu
- Pružanje usluga Zavodu zdravstvenog osiguranja Zeničko-dobojskog kantona
- Pružanje usluga Vladi Zeničko-dobojskog kantona koje bi se finansirale budžetskim transferima preko Ministarstva zdravstva, Ministarstva za poljoprivredu, vodoprivredu i šumarstvo, kao i Ministarstva za prostorno uređenje, promet i komunikacije i zaštitu okoliša,
- Pružanje usluga općinama na području Zeničko-dobojskog kantona
- Projekti iz EU fondova

Prihodi

Procjena ukupnog prihoda Instituta je oko 5 miliona KM godišnje, od čega bi prihod sa tržišta mogao iznositi cca 2,5 - 3 miliona KM, uz očekivano povećanje prihoda sa tržišta.

Potencijal tržišta za usluge koje će pružati Instituta se može procijeniti na 10 miliona KM godišnje. Koliki dio tog tržišta će preuzeti Institut, zavisice dobrim dijelom od menadžmenta Instituta i organizacije rada.

III - OBRAZLOŽENJE PRAVNIH RJEŠENJA

U **Poglavlju "Opće odredbe"** definira se osnivanje ustanove Instituta za zdravlje i sigurnost hrane Zenica (u daljem tekstu: Institut) čiji je osnivač Skupština Zeničko-dobojskog kantona (u daljem tekstu: Osnivač), te utvrđuje da ova ustanova preuzima obavljanje stručnih i drugih poslova iz djelatnosti i nadležnosti zavoda za javno zdravstvo kantona utvrđenih Zakonom o zdravstvenoj zaštiti, Zakonom o zaštiti stanovništva od zaraznih bolesti („Službene novine Federacije BiH“, broj 29/05), propisima donijetim na osnovu tih zakona, kao i drugim zakonima i propisima iz oblasti zdravstva koji reguliraju nadležnosti zavoda za javno zdravstvo kantona. Institut, u okviru nadležnosti utvrđenim ovim zakonom, preuzima obavljanje stručnih i drugih poslova iz djelatnosti i nadležnosti veterinarskog zavoda kantona utvrđenim Zakonom o veterinarstvu („Službene novine Federacije BiH“, broj 46/00), Zakonom o veterinarstvu u BiH („Službeni glasnik BiH“, broj 34/02), drugim propisima iz ove oblasti, kao i odredbama člana 15. stav 6. Zakona o kantonalnim ministarstvima i drugim tijelima kantonalne uprave - Prečišćen tekst („Službene novine Zeničko-dobojskog kantona“, br. 13/08, 3/10 i 6/12), a što će se

regulirati posebnim zakonom o prenosu nadležnosti iz ove oblasti. Osnivanjem Instituta, prestaje sa radom JU Zavod za javno zdravstvo Zeničko-dobojskog kantona, te se regulira da je Institut pravni sljednik Zavoda za javno zdravstvo Zeničko-dobojskog kantona.

U poglavlju „Naziv i sjedište“ utvrđuje se da je Institut javna ustanova u državnoj svojini, regulira se njegov naziv i sjedište. Također utvrđuje se i naziv Instituta na engleskom jeziku koji se koristi za komunikaciju u međunarodnom pravnom saobraćaju.

U poglavlju „Znak, pečat i pravni status“ regulira se momenat sticanja pravnog statusa Instituta, utvrđuje teritorija na kojoj djeluje, te izgled pečata i znaka Instituta.

U poglavlju „Djelatnost i organizacija“ utvrđuje se djelatnost Instituta u oblasti javnog zdravstva, kao i oblasti veterine, a u skladu sa propisima iz navedenih oblasti, što je detaljno obrazloženo u ovom obrazloženju (II Razlozi za donošenje). Institut može, pored djelatnosti upisane u sudski registar, obavljati i druge djelatnosti koje služe obavljanju djelatnosti upisane u sudski registar, ako se one u manjem obimu ili uobičajeno obavljaju uz upisanu djelatnost. U ovom poglavlju regulira se da je Institut osnovan i funkcionira kao jedinstvena javna ustanova koja obavlja djelatnost u javnom interesu. Institut može vršiti statusne promjene: spajanje, pripajanje, podjelu i izdvajanje. Odluku o navedenom donosi Upravni odbor uz prethodnu saglasnost Osnivača. Unutrašnja organizacija Instituta osigurava kontinuirano i nesmetano obavljanje djelatnosti Instituta u oblasti javno-zdravstvene djelatnosti kao i veterinarskoj oblasti u skladu sa ovim Zakonom, kao i zakonim iz ovih oblasti. Djelatnost Instituta obavlja se kroz organizacijske jedinice i to na takav način da funkcionalno moraju biti povezane javno-zdravstvena djelatnost, veterinarska djelatnost, naučno-istraživačka djelatnost i nastavna djelatnost, kao i sve organizacijske jedinice koje doprinose obavljanju djelatnosti koje su po prirodi opće, administrativne, pomoćne, tehničke i sl. Bliže odredbe o unutrašnjoj organizaciji Instituta će biti propisane Statutom Instituta i općim aktom donijetim na osnovu Statuta.

U poglavlju „Imovina i sredstva Instituta“ bliže se regulira struktura ove imovine, kao i način finansiranja Instituta. Imovinu Instituta čine pokretne i nepokretne stvari nad kojima je pravo upravljanja imala JU Zavod za javno zdravstvo Zeničko-dobojskog kantona, prava i obaveze koje je stekla JU Zavod za javno zdravstvo Zeničko-dobojskog kantona prema bilansu stanja na dan upisa Instituta u sudski registar pravnih subjekata, a koji ujedno čine i primopredajni bilans, kao i novac i prava koja Institut stiče svojim poslovanjem.

Ovim Zakonom osnivač se obavezuje da redovno u Budžetu Zeničko-dobojskog kantona Institutu, kao pravnom sljedniku Zavoda za javno zdravstvo Zeničko-dobojskog kantona, osigurava sredstva u iznosu koji približno odgovara sredstvima utvrđenim u Budžetu Zeničko-dobojskog kantona za 2014. godinu u razdjelu 21, budžetska organizacija 01, potrošačka jedinica 0001 – Ministarstvo zdravstva - ekonomski kod 614300, subanalitika LAX 001 pozicija “Tekući transfer za vakcine”; subanalitika LAX 002 pozicija “Tekući transfer za deratizaciju”; subanalitika LAX 008 pozicija “Tekući transfer za Kantonalni zavod za javno zdravstvo”.

Ovim se ne proizvode nove finansijske obaveze Budžeta Zeničko-dobojskog kantona, nego se postojeći transferi za Zavod za javno zdravstvo mijenjaju u transfere za Institut.

Sredstva za rad i razvoj Institut ostvaruje kroz više izvora, i to: ugovorom sa zavodom zdravstvenog osiguranja kantona; ugovorom sa nadležnim ministarstvom zdravstva i ministarstvom za poljoprivredu, šumarstvo i vodoprivredu koji se na osnovu zakona finansiraju iz budžeta; ugovorom sa fakultetima i drugim visokim školama zdravstvenog i veterinarskog usmjerenja; ugovorom po osnovu proširenog i dobrovoljnog zdravstvenog osiguranja, iz sredstava osnivača u skladu s aktom o osnivanju, iz sredstava budžeta Federacije, kantona, odnosno opštine, iz učešća korisnika zdravstvene zaštite u pokriću

dijela ili ukupnih troškova zdravstvene zaštite, slobodnom prodajom usluga na tržištu, iz donacija i drugih sredstava namijenjenih za realizaciju projekata, kao i iz drugih izvora na način i pod uslovima određenim zakonom i Statutom Instituta.

U poglavlju „Organi upravljanja i rukovođenja“ utvrđuje se da je organ upravljanja upravni odbor, njegov sastav, način izbora i imenovanja, mandat, kao i nadležnost istog. Uakodjer, u ovom poglavlju se bliže određuje način izbora i imenovanja direktora, kao organa rukovođenja, nadležnost direktora, mandat, te ostala pitanja koja su od značaja za funkcioniranje i upravnog odbora i direktora. Članom 22 ovog Zakona kod imenovanja direktora Instituta, propisana je obaveza prethodne saglasnosti ministra zdravstva i ministra poljoprivrede, šumarstva i vodoprivrede, a ne saglasnost Vlade. Ovo iz razloga što je Zakonom o zdravstvenoj zaštiti, kao jednom od zakona po kojem je Institut obavezan raditi, propisana prethodna saglasnost nadležnog ministra zdravstva. Kako se nije htjelo izaći izvan okvira kojeg reguliše Zakon o zdravstvenoj zaštiti po pitanju imenovanja direktora, predloženo je da se potreba saglasnosti na imenovanje direktora proširi i na Ministarstvo poljoprivrede, šumarstva i vodoprivrede, obzirom da su ova dva ministarstva nadležna za djelatnost Instituta.

U poglavlju „Opći akti“ regulira se da je Statut osnovni opći akt, način njegovog donošenja, te naznačava da se na osnovu Statuta donose ostali opći akti neophodni za funkcionisanje Instituta.

U poglavlju „Javnost rada i pristup informacijama u posjedu Instituta, kao i čuvanje poslovne tajne“ bliže se određuju oblici kroz koje se manifestira javnost rada Instituta. Informacije u posjedu Instituta mogu se saopštavati i fizičkim i pravnim licima u postupku i na način propisan Zakonom o slobodi pristupa informacijama u Federaciji Bosne i Hercegovine. Informacije u posjedu Instituta saopštava direktor, portparol ili osoba koju direktor odredi. Neovlašteno odavanje informacija u posjedu Instituta predstavlja težu povredu radne obaveze. U ovom poglavlju bliže se određuje pojam poslovne tajne, krug lica na koji se odnosi obaveza čuvanja poslovne tajne, kao i rok trajanja ove obaveze.

U poglavlju „Vođenje evidencija“ utvrđena je obaveza vođenja evidencija Instituta u skladu sa zakonom. Institut se obavezuje da prilikom vođenja evidencija štiti tajnost ličnih podataka pacijenta saglasno propisima o zaštiti ličnih podataka. Ovim poglavljem je utvrđen i način čuvanja evidencija saglasno propisima o čuvanju arhivske građe. Medicinska dokumentacija je trajne vrijednosti i ne može se uništiti ni otuđiti bez znanja i odobrenja ovlaštenog organa za čuvanje arhivske građe.

U poglavlju „Prelazne i završne odredbe“ utvrđene su obaveze i rokovi za Vladu Zeničko-dobojskog kantona u pogledu imenovanja privremenog Upravnog odbora Instituta, kao i v.d. direktora Instituta; obaveze i rokovi za v.d. direktora Instituta u pogledu upisa Instituta u sudski registar utvrđen ovim zakonom, kao i gašenje Zavoda za javno zdravstvo Zeničko-dobojskog kantona u sudskom registru. Ovim poglavljem posebno se uređuje radno-pravni status zatečenih uposlenika Zavoda za javno zdravstvo Zeničko-dobojskog kantona koje preuzima Institut. VD direktor će u roku od 15 dana od dana početka rada Instituta preuzetim zaposlenicima Zavoda za javno zdravstvo Zeničko-dobojskog kantona ponuditi zaključenje ugovora o radu s privremenim rasporedom do donošenja Pravilnika o unutrašnjoj organizaciji i sistematizaciji radnih mjesta Instituta. Primopredaja službenih akata između Zavoda za javno zdravstvo Zeničko-dobojskog kantona, s jedne strane i Instituta, s druge strane, izvršit će se uskladu sa Odlukom Vlade Zeničko-dobojskog kantona. Ovim poglavljem se utvrđuju rokovi za donošenje Statuta, kao i Pravilnika o radu, te Pravilnika o unutrašnjoj organizaciji i sistematizaciji radnih mjesta

Instituta. Institut zadržava pravo korištenja državne imovine koju je koristio Zavod za javno zdravstvo Zeničko-dobojskog kantona na dan stupanja na snagu ovog Zakona. U ovom poglavlju se posebno utvrđuje da se ovaj Zakon ima smatrati osnivačkim aktom na osnovu kojeg će se Institut upisati u sudski registar kod nadležnog suda. S tim u vezi ovlašćuje se Upravni odbor da saglasno ovom Zakonu donese odluku kojom će bliže odrediti šifre djelatnosti u skladu sa važećom klasifikacijom djelatnosti u BiH.

Članom 45, regulisano je stavljanje van snage odluke o preuzimanju prava i obaveza osnivača i usklađivanju organizacije i poslovanja Javne ustanove Kantonalni zavod za javno zdravstvo, što je u skladu sa odredbama člana 3. ovog Zakona.

Osim toga u završnim odredbama utvrđeno je vrijeme stupanja na snagu ovog zakona.

IV - FINANSIJSKA SREDSTVA

Za provođenje ovog Zakona nisu potrebna dodatna finansijska sredstva iz kantonalnog budžeta.

Sredstva koja su do sada u Budžetu Kantona bila predviđena za Zavod za javno zdravstvo Zeničko-dobojskog kantona, će se dalje doznakačavati Institutu, kao javnoj ustanovi formiranoj ovim zakonom, ali u obliku transfera za projekte iz oblasti javnog zdravstva.

Sredstva u Budžetu za 2013. godinu, planirana za Zavod za javno zdravstvo ZDK

Razdjel	Budžetska organizacija	Potrošačka jedinica	Ekonomski kod	Subanalitika	Naziv pozicije	Izdaci iz budžeta 2013. (KM)
21	01	0001	614300	LAX 001	Tekući transfer za nabavku vakcina	100.000
				LAX 002	Tekući transfer za deratizaciju	100.000
				LAX 008	Tekući transfer za Kantonalni zavod za javno zdravstvo	50.000
						250.000

V- MIŠLJENJE

Saglasno proceduri donošenja zakona, kao i Poslovniku o radu Vlade Zeničko-dobojskog kantona („Službene novine Zeničko-dobojskog kantona“, broj 3/12) pribavljena su pozitivna mišljenja Sekretarijata za zakonodavstvo Zeničko-dobojskog kantona, Ministarstva finansija Zeničko-dobojskog kantona, Ministarstva za pravosuđe i upravu Zeničko-dobojskog kantona. Također pribavljena su i pozitivna mišljenja Federalnog ministarstva zdravstva i Federalnog ministarstva poljoprivrede, vodoprivrede i šumarstva.

VI- DODATNA REGULATIVA

U cilju boljeg razumijevanja razloga za osnivanje, buduće organizacije i funkcionisanja Instituta, pripremljen je i Elaborat o osnivanju Instituta za zdravlje Zenica.